



**UKA 2016/124.1**  
**29 sept. 2016**  
**Ane Hansen**

**Siunnersuut uunga: Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. Xx, xx, xx 2016-imeersup allangortinneqarneranik Inatsisartut inatsisaat**

(Aalisarnermut, Piniarnermut Nunalerinermullu Naalakkersuisoq)

Avannaani qimmit nappaalanerisa kingulliup Ilulissat eqqaanilu pisut takutippaa qimmeqarneq pillugu inatsisitigut iluarsisariallit qanoq amerlatigisut.

Pisimasup taassuma aamma ersersippaa oqartussaaffinnik isumagisassanillu ilaannakortunik kommunimut tunniussisarnerit qanoq kinguneqarsinnaasartut. Qeqertami Ilulissanilu qimmit nappaalalermata ullorpassuit oqartussaasut soriangillat kikkut qanoq akisussaaffeqarnerisut paatsiverukkamikkit. Pisimasup aamma taassuma takutippaa qimmit nappaalalersinnaaneranut upalugarsimaneq qanoq annikitsigisoq, uumasut nakorsaata Namminersorlutik Oqartussat ataani atorfinitsinneqarsimasup uumasut nappaalalersinnaaneranut upalugarsimanera qanoq annikitsigisoq pisimasumi tassani aamma takuarput. Uumasut nappaalalersinnaaneranut upalugarsimanerup erseqqissarneqarluni suliarineqarnissaa inuit Ataqatigiinnit piumasarerusupparput.

Inuit Ataqatigiinni isumaqarpugut qimmit qimuttut nappatsaaliornissaat nalunarsorneqarnerallu pillugit pisortaniit nakkutilliineq amigateqartorujussuusoq, aamma taamatut ippoq naliginnaasumik qimmit uumasuutigineqartartut, savaatillillu qimmiisa nappatsaaliuineq pillugu nakkutigineqaneqarnerat eqqarsaatigalugu.

Siorna 2015-imi Inatsisartut ukiakkut ataatsimiinneranni Inatsisartut aaliangerput qimmit qimuttut immikkut isigalugit inatsisiliunneqassasut tamatumalu saniatigut naliginnaasumik qimmit uumasuutigineqartut qitsuillu immikkut ilangullugit inatsisiliunneqassasut. Suliassaq taanna sukumiisumik suliarineqartariaqarpoq.

Oqartussaaffinnik nakkutilliinernillu kommunimut tunniussisoqassappat ilaannakortumik pinnagu tamakkiisumik piarersarluakkamillu tunniussisoqartariaqarpoq, ilaannakortumik suliassanik oqartussaaffinnillu tunniussisarnerit qanoq kinguneqartarneri pitsaangitsuusoq arlalissuartigut takussutissaqarermat.

Taamatut oqaaseqarluta inatsisissap allanguutissaatut siunnersuuti isumaqatigigatsigit oqaatigissuarput, suliassallu aappasaanerqartinnani Inatsisartut Aalisarnermut, Piniarnermut, Nunalerinermullu ataatsimiisitaliani misissorluarneqassasoq inassutigalutigu.